

Morning Dogri (NSD) Bulletin 13-01-2026

खास-खास खबरां:-

1. प्रधानमंत्री नरेन्द्र मोदी होरें आखेया ऐ जे डिजिटल इंडिया- स्टार्ट-अप ते युवाएं दी भागीदारी देसै दे भविक्ख गी नमां अकार देआ रदी ऐ। उनें आखेया जे 2047 च भारत दे विकसित राष्ट्र बनने च अज्जै दे नौजवानें दा मता योगदान रौहग।
2. अमरीका दे राष्ट्रपति डोनाल्ड ट्रम्प होरें आखेया ऐ जे ईरान कन्नै कारोबारी सरबंध रखने आहले मुल्ले गी अमरीका दियें आर्थिक बंधशें दा सामना करना पौग।
3. रक्षा मंत्रालय नै कर्तव्य पथ पर गणतंत्र दिवस 2026 दी फुल ड्रेस रिहर्सल लेई मुफ्त पास जारी करने दी घोषणा कीती ऐ।
4. उत्तर –भारत दे प्रमुख लोक पर्वे चा इक “लौहड़ी” दा ध्यार अज्ज पंजाब- जम्मू- कश्मीर- दिल्ली ते हरियाणा च मते उत्साह कन्नै मनाया जा रदा ऐ।
5. अज्जै थमां शुरु होआ रदी इंडिया ओपन बैडमिंटन टूर्नामेंट च पी.वी. सिंधु भारत दी अगुआई करगंन।
6. मौसम विभाग नै अज्ज बी राजस्थान- हिमाचल-प्रदेश- जम्मू-कश्मीर- लद्दाख- पंजाब- उत्तराखंड- हरियाणा- दिल्ली- बिहार- पच्छिम बंगाल ते सिक्कम च घनी धुंध दी चेतावनी दिती ऐ।



PM-VB Young Leaders

प्रधानमंत्री नरेन्द्र मोदी होरें आखेया ऐ जे डिजिटल इंडिया स्टार्ट-अप ते युवाएं दी भागीदारी देसै दे भविक्ख गी नमां आकार देया दी ऐ। कल संजा नमीं दिल्ली च आयोजित “विकसित भारत यंग लीडर्ज डायलॉग” दे समापन समारोह गी सम्बोधित करदे होई प्रधानमंत्री होरें आखेया जे स्हाड़े युवा उद्यमियें- नमियां काहडा कडुने आहलें- नव प्रवर्तकें दे जतनें कन्नै मुख्य रचानात्मक ते प्रोद्योगिकी आधारित क्षेत्रें च तेजियां कन्नै विकास करै करदा ऐ। मोदी होरें आखेया जे डिजिटल इंडिया अभियान दी बढौलत- मुल्ले च रचनाकारें दा इक नमां समुदाय त्यार होआ ऐ- जेहदे नै अरिंज इकानमी गी सदा थमां मती रफतार हासल होई ऐ। प्रधानमंत्री होरें आखेया जे 2047 च देसै दी अजादी दे 100 बरे पूरे होने पर मजूदा युवाएं दे जीवन दा सब्बनें शा महत्वपूर्ण समा होग- कीजे उंदी छमता गै भारत दी छमता बनी दी होग। मोदी होरें आखेया जे इस बेल्लै दे नौजवानें दी कामयाबी- गै देसै दी कामयाबी गी नमियें ऊंचाइयें पर लेइयै जाहग। प्रधानमंत्री होरें आखेया जे “यंग लीडर्ज डायलॉग” इक ऐतिहासिक ते अनोखी पैहल ऐ- जेहडी बडे घट्ट समें च गै इक महत्वपूर्ण मंच दे रुपै च स्थापत होई चुकी दी ऐ। प्रधानमंत्री होरें स्टार्ट-अप इंडिया- डिजिटल इंडिया –बपार ते सखाल जनेहें महत्वपूर्ण बदलावें ते पैहलकदमियें दा जिक्र करदे होई आखेया जे एल्लै देसै च इक ज्हार कोला मते रक्षा क्षेत्र दे स्टार्ट-अप कम्म करा करदे न ते युवा उद्यमी ड्रोन- ड्रोन

रोधी प्रणाली- आर्टिफिशल इंटेलीजेन्स आधारित कैमरें ते रोबोटिक्स जनेइयें तकनालोजियें पर कम्म करा करदे ना। उनें आखेया जे अंतरिक्ष क्षेत्र गी निजी क्षेत्र लेई खोलने कन्नै बी एहदे च बडी तेजिया कन्नै विस्तार होआ ऐ। मोदी होरें स्वामी विवेकानंद हुंदे जीवन- सिद्धांतें ते संदेश गी सारी दुनिया दे नौजवानें लेई इक प्रेरणा ते मार्ग-दर्शक करार दिंदे होई उनेंगी श्रद्धांजलि भेंट कीती। 9 कोला 12 जनवरी तगर आयोजित “विकसित भारत यंग लीडर्ज डायलॉग” च मुख्य भरै थमां 50 लकख कोला मते नौजवानें हिस्सा लैता।



Trump –Iran Tariff

अमरीका दे राष्ट्रपति डोनाल्ड ट्रम्प होरें आखेया ऐ जे ईरान कन्नै कारोबारी सरबंध रक्खने आहलें देशे गी अमरीका दियें आर्थिक बंधशें दा सामना करना पौगा। ट्रम्प होरें अपनी इक सोशल मीडिया पोस्ट च आखेया ऐ जे ईरान कन्नै बपार करने आहलें मुलखें पर- अमरीका कन्नै हर चाल्ली दे बपार-कारोबार पर 25 प्रतिशत टैक्स तुरत प्रभाव कन्नै लागू होई जाहगा। तोंआई अमरीका दी प्रैस सचिव कैरोलीन लेविट होरें आखेया ऐ जे राष्ट्रपति ट्रम्प ईरान दे मामले च फौजी कारवाई सनें होर केंई चाली दे विकल्पें पर सोच-विचार करा करदे न- पर कूटनीतिक रस्तें राएं कोई बेहतर हल्ल तुप्पना उंदी पैहली तरजीह ऐ। तोंआई ईरान नै अमरीका दे कुसै बी हमले दा पूरी तगडेयाई कन्नै परता देने दी चेतावनी दिंदे होई आखेया ऐ जे ओहदे थेहारबंद बल देश दी रक्षा लेई कुसै बी हद तगर जाने लेई त्यार ना।



Parade Passes

रक्षा मंत्रालय नै कर्तव्य पथ पर “गणतंत्र दिवस-2026” दी फुल ड्रेस रिहर्सल परेड लेई मुफ्त पास जारी करने दी घोषणा कीती ऐ। एह पास 15 ते 16 जनवरी गी मुफ्त बुकिंग लेई उपलब्ध रोहगंन। पास बुक करने दी इच्छेया रखने आहले लोक www.aamantran.mod.gov.in वेबसाईट या आमंत्रण मोबाईल ऐप पर- पास बुक कराई सकदे ना। इस बरे गणतंत्र दिवस दी फुल ड्रेस रिहर्सल परेड 23 जनवरी गी आयोजित कीती जाहगा।



Lohri

उत्तर-भारत दे बड्डे लोक पर्व इचा इक “लौहड़ी” दा त्योहार अज्ज पंजाब- जम्मू-कश्मीर- दिल्ली ते हरियाणा च मते उत्साह कन्नै मनाया जा रदा ऐ। मनाया जा रदा ऐ। ऐसी मान्यता ऐ जे सुर्ज एदे मगरा उतरायण होई जन्दा ऐ। लोक अज्ज दे दिन संजा लै लौहड़ी बालदे न- उस्सी अर्ध देइयै मत्था टेकदे ना। बच्चें अज्ज दे दिन छज्जे लेइयै- हिरण ते होर भांती-भांती दे

दा वेश धारियै ते रिवायती गीत गाइयै लौहड़ी मंगदे ना। लोक इक-दुए गी लौहड़ी दियां मुबारकां दिंदे न ते मुंगफली-गजक-मेवे-रेओडियां बंडदे ना। राष्ट्रपति द्रौपदी मुरमू ते प्रधानमंत्री नरेन्द्र मोदी हुंदे इलावा केई सियासी- समाजी ते धार्मिक लीडरें लोकें गी “लौहड़ी” दियां शुभकामनां दितियां ना। उनें आखेया जे एह त्योहार आपसी भाईचारा-सौहार्द ते इक-दुए प्रति इज्जत ते खुशियां लेइयै औन्दा ऐ।



AIIMS NIPAH Virus -WB

केन्द्र नै पच्छिम बंगाल च “निपाह” वायरस दे दंडु संदिग्ध कसरियें दा पता लग्गने दे बाद राज्य च इक राष्ट्रीय संयुक्त प्रकोप राहत दल तैनात कीता ऐ। इनें कसरियें दी पंछान कल कल्याणी दे भारती आयुर्विज्ञान अनुसंधान परिषद दी लबाट्री च होई ऐ। सेहत ते परिवार कल्याण मंत्रालय नै इक वीडियो बी जारी कीता ऐ- जेहदे च केन्द्री सेहत मंत्री जे.पी. नड्डा होरें आखेया ऐ जे केन्द्र सरकार –राज्य सरकार गी “निपाह” दे प्रकोप कन्नै असरदार ढंगै सिर निबडने लेई व्यापक तकनीकी ते परिचालन सहायता उपलब्ध करा करदी ऐ। नड्डा होरें आखेया जे उनें मुखमंत्री ममता बैनर्जी हुंदे नै गल्लबात करियै- इस दिशा च केन्द्र ते राज्य बशकार नेडमें तालमेल दी जरूरतै पर जोर दिता।



Badminton- India Open

दंडु बारी ओलम्पिक मैडल जित्ती चुकी दी पी.वी सिंधु अज्जै थमां शुरु होआ रदे इंडिया ओपन बैडमिंटन टूर्नामेंट च भारत दी अगुआई करंगन। प्रतियोगिता दा सरिस्ता नमीं दिल्ली दे इंदिरा गांधी इंदौर स्टेडियम च होगा। सिंधु सट्ट लग्गने कारण लम्मे चिरै मगरा वापसी करै करदी ऐ। अज्ज पैहले रोज मालविका बसोड ते तनवी शर्मा बी महिलायें दे इक्कले-इक्कले मकाबले च अपनी चुनौती रखंगन। मर्दे दे इक्कले-इक्कले मकाबले च लक्ष्य सेन ते आयुष शेटी पैहले दौर च सामने-सामने होगन।



Budget Session

केन्द्रीय बजट 2026-27 अगले महीने दी पैहली तरीख गी लोकसभा च पेश कीता जागा। संसद दा बजट सत्र इस महीने दी 28 तरीक थवां शुरु होइयै 2 अप्रैल तगर चलोगा। संसद दे बजट सत्र दी शुरुआत 28 जनवरी गी राष्ट्रप्रति द्रौपदी मुरमू हुंदे आसेया संसद दी सांझी बैठक च अभिभाषण कन्नै होगा। बजट सत्र दा पैहला गेड 28 जनवरी थवां 13 फरवरी तगर ते दुआ गेड 9 मार्च थवां 2 अप्रैल तगर चलोगा। सत्र दे दौरान कुल 30 बैठकां होगन। लोकसभा अध्यक्ष होरें इस बारे कल नमीं दिल्ली च संवाददाता सम्मेलन च जानकारी दिती।



Weather

मौसम विाग नै अज्ज राजस्थान च घनी शा मती घनी धुंध दा रेड अलर्ट जारी कीता ऐ। मैहकमे नै हिमाचल प्रदेश ते उत्तर प्रदेश च बी घनी धुंध दा रेड अलर्ट जारी कीता ऐ। अगले दो-त्रै दिनें दरान जम्मू-कश्मीर, लद्दाख, हिमाचल प्रदेश, उत्तराखंड, पंजाब, चंडीगढ, हरियाणा, राजस्थान, दिल्ली, बिहार, पच्छिम बंगाल च हिमालय दे तराई क्षेत्रें ते सिक्किम घनी धुंध छाए दे रौने दी पेशगोई कीती ऐ।

